

## **Publicaziuns officialas dils 19 settember 2025**

### **Vischnaunca Trun**

#### **Annulaziun votaziun communal dils 28-09-2025**

Deplorablamein ei capitau all'administraziun communal in sbagli ed ils acts tarmess cun il material da votaziun communal ein buca cumplets. Ord quei motiv vegn la votaziun per la lescha davart l'indemnisaziun dallas prestaziuns dalla vischnaunca da Trun en connex cul provediment d'electricitad annullada e spustada sin il proxim termin da votaziun il davos da november 2025. Las votaziuns federalas ein buca pertuccadas dil sbagli e han liug sco previu. Bien engraziament per la capientscha.

*Suprastonza communal Trun*

#### **Votaziun federala**

L'urna principala en canzlia communal ei aviarta sco suonda:

Gievgia, ils 25-09-2025, 09.30-11.30, 15.30-17.30

Venderdis, ils 26-09-2025, 09.30-11.30, 15.30-17.00

Dumengia, ils 28-09-2025, 09.00-10.30

La documentaziun da votar duess mintga votant/a haver obteniu. Cass cuntrari san ins s'annunziar immediatamein, denton il pli tard entochen venderdis, ils 26 da settember 2025 allas 17.00 tier l'administraziun communal (tel. 081 920 20 40).

Levgiament da votar

Mintga votant/a ha la pusseivladad da dar giu sia vusch a scret. En gliez mument sto el/la observar il suandont:

1. Emplenir ora ils cedels da votaramaun e metter quels en la cuviarta da votar grischa e serrar giu ella.
2. Metter la cuviarta da votar grischa ensemen cun il certificat dil dretg da votar suttascret en la cuviarta alva, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communal saveis Vus tarmetter cun posta (gratuitamein) ni directamein fierer en la scaffa da brevs dalla canzlia communal.

Ils cedels da votar ston esser il pli tard la dumengia, ils 28 da settember 2025 allas 10.30 tier l'administraziun communal. Aschinavon ch'ei vegn buca risguardau sura instrucziuns da votar, ein ils cedels da votar nunvaleivels.

*Suprastonza communal*

## **Sanaziun dalla via Carmanera**

Sco finiziun dalla sanaziun dalla via Carmanera retscheiva il tschancun naven dalla via Principala tochen tier la casa da Flurine Sandra Decurtins la cuvrida fina. Ord quei motiv sto quella part dalla via Carmanera vegnir serrada naven da mesjamna, ils 24 da settember entochen mardis, ils 30 da settember 2025. Il traffic sa sviar sur la via Campliun. En cass da schliatt'aura ston las lavurs vegnir spustadas. Per damondas stat il cau dil menaschi tecnic, Albert Spescha (081 920 20 45), a disposiziun.

*Suprastonza communal Trun*

## **Mortori**

Tomaschett-Cajacob Mierta, naschida ils 28 da matg 1945 e morta ils 16 da settember 2025.

*Controlla da habitonts Trun*

## **Biblioteca Trun**

Venderdis, ils **19 da settember allas 14.30** viseta il lieuret Pauli la Biblioteca. Affons denter 36 onns cun bab ni mumma, tat ni tatta ein cordialmein envidai da vegnir e tedlar. La bibliotecaras selegnan sin vossa viseta

## **Niev naven dad immediat**

### ***Fabrica veglia16 – Vies local per events cun caracter***

La fabrica veglia16 a Trun stat naven dad immediat a disposiziun per maridaglias, anniversaris, fiastas d'interpresas e seminars. Installaziuns modernas entaupan in ambient historic – per muments nun emblideivels. Contact: Daniela Manetsch, Telefon 076 355 79 18, Mail: [n.racheter@distec.ch](mailto:n.racheter@distec.ch). Pagina d'internet: [www.eventlocation.distec.ch](http://www.eventlocation.distec.ch)

## **Preavis – Concerts da Mario Pacchioli a Trun**

Sut il tetel «Canzuns ord mia valischa» envidan Mario Pacchioli e la vischnaunca da Trun a treis seras da concert en sala da cultura.

### ***Datums:***

Venderdis, ils 28 da november allas 20.30

Sonda, ils 29 da november allas 20.30

Dumengia, ils 30 da november allas 17.00

Reservaziun: [canzlia@trun.ch](mailto:canzlia@trun.ch), 081 920 20 40 Dapli informaziuns anfleis vus sut [www.mariopacchioli.com](http://www.mariopacchioli.com) ni sut [www.trun.ch](http://www.trun.ch)

*Administraziun communal Trun*

### **La gruppa da pensunai Trun**

envida ils pensiunai/pensunadas dalla vischnaunca da Trun tier ina sentupada per guder in bien toc petta cun caffè e star da cumpignia. Mesjamna, ils 24 da settember 2025 ella uustria Chispàcius a Schlans. Partenza allas 14.00, center communal Trun, Annunzias: tochen 20-9-25, M. Schmed, 079 211 97 95

### **Museum Cuort Ligia Grischa**

**Dumengia, ils 21 da settember** allas 14:15, Guida publicatras l'exposiziun d'art «Skizzas dad Alois Carigiet» cul curatur Marco Coray. La guida ei cumprida el prezi d'entrada. cordialmein envida

*il team dil museum*

### **Uniun samaritana Sumvitg-Trun**

#### **Acciun da spender saung**

Gliendisdis, ils **29 da settember 2025** naven dallas 18:30 entochen allas 20:30 en sala dil center communal a Trun. L'uniun samaritana selegra sin stedia participaziun.